

16/06/2025

AKASHVANI AIZAWL

2:30pm

REGIONAL NEWS

GOVERNOR

Larsap General (Rtd) Vijay Kumar Singh-a'n vawiin khan Assam Regiment Raising Day a hmanpui.

SFX

Assam Regiment din champhaphak (Raising Day) vawi 84-na pualin vawiin khan Treasury Square, Aizawla War Memorial-ah Assam Regiment sipai huaisen, ram tana nun hlantute zahna leh hriatrengna lantir nan pangpar dah a ni a, he hunah hian Mizoram Larsap General (Rtd) Vijay Kumar Singh bakah Mizoram Ex-Services Leaque, Assam Regiment leh Assam Rifles hotute chuan zahna pangpar an dah a. Hemi hnu hian AR Ground, Aizawlah Assam Regiment Raising Day pualin inkawm ho a ni. He hunah hian Larsap General (Rtd) Vijay Kumar Singh chuan Assam Regiment-te chu an dinchamphaphak pualin duhsakna a hlan a. Ram tana rawng an bawl tawhnate chhuanawm tiin, tha taka chhawmnung zel turin a fuih a ni.

MESL President, Champhai South bialtu MLA ni baw, Pu Clement Lalhmingthanga chuan hun hlu tak senga Assam Regiment-te dinchamphaphak hmanpuitu Larsap chungah lawmthu sawiin, programme changtlung tak buatsaihtu Assam Rifles-te chungah lawmthu a sawi baw. Vawiin hun hmanah hian Assam Rifles DIG Brig Pushpendar Sorayan, MESL Patron Lt Col ZS Zuala, Padma Shri Awardee Hav Lalbiakthanga, President, World War-II Veterans Association bakah MESL member-te, Assam Regiment leh Assam Rifles-te an tel a ni.

<><><>

DAJGUA AWARENESS & BENEFIT SATURATION CAMP

India in kum 2047-a ram changkang anih hun tur atana hmalakna kalkawnga tribal mipuite zirtirna leh an mamawh zualpui pekna tura hmalakna Dharti Aaba Janjativa Gram Utkarsh Abhiyan (DAJGUA) Awareness & Benefit Saturation Camp chu Mizorama kalpui turin vawiin khan Chief Minister Pu Lalduhoma'n a hawng.

Planning & Programme Implementation Conference Hall-a DAJGUA a hawanna ah Chief Minister Pu Lalduhoma chuan hmalakna chu tun thla chhunga kalpui ani a ti a, Mizoram mipui zaa sawmkua leh pali aia tam chu tribal anni tih sawiin Central sawrkarin tribal te hamthatna a rawn duan chu state pumpui hamthatna a ni nghal tih sawiin State sawrkarin hmasawna scheme a duan pawh tribal hamthatna tur a ni nghal zel tih a sawi.

Chief Minister chuan sawrkar laipuiin camp chu tha taka kalpui a, state dangte entawntlak khawpa tihlawhtling turin an beisei tih sawiin a mawhphurtu zawng zawngten tha taka hlen theuh turin a chah baw.

DAJGUA hi sawrkar laipui flagship programme niin a kalpuitu tur line department 17 a thlang a, heng line department te hian thawk hovin India ram tribal awmna district thlanchhuah 549 ah te hna an thawk ang. Mizoram bikah chuan line department 14 ten district 11 a mihring nuai li vel huamin khaw 383 ah kalpui a ni.

DAJGUA hi District hrang hrangah pawh hawn nghal a ni a, Sub-Divisional Officer Pu Ngulzathuama chuan vawiin khan Champhai District ah a hawng a, khaw 30 ah kalpui tur ani tih a sawi.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar puan leh a ni ang.

<><><>

STOP DIARRHOEA CAMPAIGN, 2025

Vawiin khan Khawzawl District Hospital (OPD kawt) ah Stop Diarrhoea Campaign buatsaih a ni a, District Bawrhsap Pu K. Vanlalthiana chu khuallian niin Thupuih "Kawthalo ven nan faina leh ORS a pawimawh" tih hman a ni.

Khuallian Pu K. Vanlalthiana chuan faina leh hriselna kawnga hma la zel turin a chah a, kawthalo avanga nunna chan awm tawh lo se a duh thu leh chumi atan thawktute pawhin tan la tur leh mipuite pawhin zawm tur te tha taka zawm turin a chah a ni.

'Stop Diarrhoea Campaign' hi kawthalo do beihpui thlakna, kum 2014 atanga lo hman tan tawh niin kum tin fur ruahtui tam hma/tam laia hman thin a ni. Mizoramah pawh India ram hmun hrang hrang rualin lo hman tawh thin a ni a; kumin pawh hian campaign hun chhung hi June ni 2 atanga ni 15 leh June ni 167 atanga July ni 31 chhunga hman leh tur a ni a. National Health Policy 2019-in a tum danin naupang thihna a tlakhiam theih nan hmalak zel tum a ni a, Naupang kum 5 hnuai lamah kawthalo vanga thi chu za zela 4.8% an la ni reng a. India ramah kum tinin naupang kum 5 hnuai lamah mi singnga velin an la tih phah reng a ni.

STOP Diarrhoea campaign chhung hian naupang kawthalo enkawl nana tha ber 'ORS leh Zinc' thatna nasa lehzuaw zawka inzirtirna pek a ni leh dawn a. ASHA-ten an mahni bial chhungah naupang kum 5 hnuai lamte hnenah kawthalo enkawl na turin ORS an sem ang a. Sawrkar damdawi in leh Subcentre-ah te leh Anganwadi Centre-ah te 'ORS-Zinc Corner' siam a ni ang. Heng hmun siam bikah hian naupang kawthalote chu enkawl na pek an ni ang a. ORS siam dante, Faina chungchangte leh ORS leh Zinc pawimawhna te a hmuna thawktuten an hrilh thin dawn a ni.

<><><>

PM MODI

Prime Minister Narendra Modi chuan vawiin khan Cyprus President Nikos Christodoulides chu kawmin India chuan Cyprus chu ram hmasawna leh sumdawna lamah thawh dunna thuk zawk neihpui a tum thu a sawi.

Prime Minister Narendra Modi chuan kum 23 hnua India Prime Minister in Cyprus a tlawh lehna hmasa berah Business Roundtable a òan a ni chuan India leh Cyprus in thawhdunna a ngaih pawimawhzia a tilang a ni a ti a. Prime Minister chuan kum kal taa India in hmasawna hrang hrangte a neih te leh GST atanga digital payment a kalpui dan te a tarlang a ni.

<><><>